

Haya sa un tiki mas di FAVI



Despues di vakantie grandi, FAVI a cuminsa bek cu su actividadnan semanal. FAVI a cuminsa riba diahuebs cu e grupo di obra di man cu yama FAVI-Do.

FAVI-Do ta consisti di un grupo di mas o menos 50 persona di entre 30 te cu 90 aña y cu ta ciego of cu tin un limitacion visual. Nan ta bini huntu tur diahuebs di 9or di mainta te cu 11or di mainta. Bao di guia di algun voluntario e clientenan ta traha flor, macuto di pitriet y ta traha obranan di macrame. Mayoria di e clientenan masculino ta gusta hunga domino.

Ariba diamars un grupo di mas o menos 20 cliente ta haci ehercicio. FAVI tin un fitness-room amplio cu diferente machin pa train. Tambe e grupo ta haya aerobics y yoga pa relaha e curpa. E ehercicionan ta wordo duna door di 2 boluntario cu ta pensionado.

FAVI ta brinda tambe, les di computer y typeles. Actualmente algun cliente ta siguiendo e lesnan aki y ya caba nan por haci uso di internet y tambe chat. Ta di remarca cu tecnologia ta basta avanza y ta haci cu awor aunke cu bo tin un

limitacion visual of bo ta ciego, bo por hasi uso di computer y internet.

Banda di actividadnan den grupo, FAVI ta brinda actividadnan individual tambe. Por menciona actividadnan di bida diario como un ehempel. Ora un persona ta avisa cu pa motibo di su bista e no por funciona optimal mas den su rutina diario, FAVI ta brinda guia den esaki. FAVI por guia e persona den su cas (y riba caya), pa orienta su mes mihor, tambe con pa anda cu materialnan y reconoce obhetonan. Esaki ta wordo hasi dor di marka obhetonan cu un color cu bon contraste of dor di marcanan den forma rondo, vierkant etc.

Esaki ta wordo haci cu un stift cu su inkt ta bira duru y ta haci posibel cu bo poo fula locual bo a marca. Ahustacion di luz den cas of na trabao tambe ta hasi un diferencia pa personan cu un limitacion visual. E guia tambe por ta un simpel tip cu ta haci un diferencia grandi.

FAVI tin materialnan cu ta yuda e persona ciego of cu un limitacion visual sinti su mes mas util. E garoti blanco ta yuda pa orienta y pa nota obstaculo. Daisyspeler ta e aparato cu ta duna e persona ciego of cu un limitacion visual e posibilidad pa scucha un buki cu e ta gusta. E "talking watchnan" ta hopi usa pa clientenan cu problema di bista ya cu nan no mester depende di un otro hende/radio of tv pa informa nan e ora.

Asina por sigui menciona mas medionan auxiliar cu FAVI ta brinda.

Guia social
FAVI ta duna guia y tambe ayudo practico riba tereno social, emocional y financiero, na personanan cu un limitacion visual of cu ta ciego y tambe na nan famia. Hopi biaha ta pensa na brinda ayudo na e persona cu a perde su bista of cu su bista a bira limita, pero ta lubida riba e famia cu tambe ta haye confronta cu cambionan. FAVI ta brinda guia na famia pa asina nan por sina biba cu e cambionan aki y toch sigui biba mas optimal posibel. Si bo perde bo bista of bo bista bira limita, e ta un perdida. Hopi biaha e persona mes y su famia ta pasa den un proceso di aceptacion. E proceso aki pa esun e ta mas facil of mas dificil cu pa e otro. FAVI ta brinda guia den e proceso di aceptacion aki.

Guia tempran pa baby y muchanan mas grandi
Aruba conoce casonan di babycutanaceciego of cu un limitacion visual. FAVI ta traha conhuntamentec u Jeugdgezondheidszorg y Stichting Wit Gele Kruis pa brinda un mihor servicio na baby y muchanan cu tin un problema visual of cu ta ciego. Stichting Wit Gele Kruis ta e instancia cu hopi biaha tin e prome contacto cu babynan y nan mayornan. E stichting aki ta hasi chekeo riba diferente aspecto di cual tambe e bista. Na momento cu Wit Gele Kruis detecta cu un mucha tin un problema

cu su bista e ta referi e mayornan na dokter di bista y FAVI. FAVI ta hasi observacionnan mas detaya pa cu e bista y tambe ta tene contacto estrecho cu dokternan di bista. Despues di e chequeonan haci dor di FAVI y tambe e resultado di analisis di dokter di bista, FAVI por brinda yudansa ora cu ta necesario. Ta importante pa detecta problemanan di bista trempan ya cu esaki ta pa un mihor desaroyo mayan.

FAVI ta brinda guia tambe na muchanan mas grandi cu ta bishita scolnan regular. E trahadornan di FAVI (guia educacional) ta tene contacto cu mayornan y maestronan di scol. Un plan di guia ta wordo formula huntu cu e mayornan y maestro di scol pa guia e mucha pa e por funciona optimalmente na scol.

Un problema di bista of cu ciegera no kier men cu un mucha no por desaroya su mes. FAVI conoce personanan cu un bista limita of ciego cu a logra nan meta y cu awor ta trahando. Sr. Gino Wever cu ultimo tawata den e programa di Un dia den Bida ta un ehempel di e personanan aki.

Asina FAVI por sigui menciona hopi ayudo mas cu por wordo ofreci na personanan cu un limitacion visual of cu ta ciego y nan famianan. Pa informacion mas detaya, tuma contacto cu oficina di FAVI na telefoon 5825222 of pasa na Primavera 255. FAVI ta cla pa yuda bo.

